

2PE -

2 Piyerə

Bələ nii sagı tə,

Piyerə

nə púpúní

Piyerə bələ nii sagı tə yuu wa sugu

Lìù tə, v nə púpúní sagı ku tə

Sagı ku tə yí *tuntunu Piyerə nəe bələ nii sagı tə, v nə púpúní.

Lìa tə nə, v nə púpúní

Piyerə púpúní v sagı tə v pa *Kərisə lìa tə nə, ba nə wulə luv tə mama wa.

Sagı tə wa sugu

Nəŋə ku tə yırı, v nə púpúní ba nə: Sagı ku tə ku zıga lìa tə nə, ba nə kàrì kunkun kàrì tə, tə nə zıga Zwezi-*Kərisə suywáŋú tə nə. Ba lìa təntə yàá pwè Kərisə lìa tə duən nə, ba ga vaŋa ba, ba kəni ba tutunəe kukwınan tə wa. Piyerə swın ba con, sə ba twá Yu cwəŋə tə zəni də pùé nədu, v nə kúrí ba tə yırı. Ku mù yırı nə, ba me, sə ba twá Yu sagı tə cígá kàrì tə nə, ba wà me, sə ba cugu kunkun karnyına-ba sùràn tə. *Yuu-Tiu Zwezi wá pıí v bà. Ku me, sə lìa dàn wá də bican sié, də pupwən. Ba me, sə ba ya lìa tə, ba nə poli Yu pùé.

Təntən jùná bwálí

¹ À mù Simon Piyerə à yí Zwezi-**Kərisə* tutunbiu, à ga yí v **tuntunu*. À púpúní sagí ku tə, á mù lià tə nə, á nə ní yuywanu, á kə á waa Zwezi nə, ndə nə də nə ní yuywanu nə kə nə waa v nə nətú. Ku nətú tə twá də Zwezi-*Kərisə* cígá tə nə. U mù nə yí nə Yú, v mù ga nə jon nəba nə cuna wa. ² Yú də nə **Yuu-Tiu* Zwezi nə wá fwa ba pubwanu tə á yíra, ba ga pa aba ba bican sìé, tə nə sùrí wuuu, ku twá á yənu tə nə, á nə yèé ba.

(Zwan 17.2-3, Titə 2.11-14, Filipə tián 1.9-11, 3.8-14, Ebərə-ba 6.11-12)

³ Yú twá v diàn tə nə, v pa nəba wiən tə mama, tə nə mɛ də nəba, sə nə ma twá v nə zəni, nə nə yèé wá yírí. U mù nə twá v tətə dun yofaran tə nə, v ma kúrí nəba. ⁴ Mə ku twá yìèn təntə, Yú ma kàn nii də, v wá pa nəba wiən nəfaran, tə nə ziən zənzən. U fwa ku nətú, sə ku pa á dàń nə ní tə wiən təntə, sə á wàńí á lɪ á tiàn yokukwɪnan tə wa, tə nə sùé luv. Yìèn təntə yí ləzoni pwíí yokukwɪnan fíra, tə ga cùgà luv tə. Yá á dàń wá ya ndə Yú nə. ⁵ Ku mù tə yírí, á kənə á kajaɲa mama lá. Á ken á waa Zwezi-*Kərisə* nə. Á pian yofwamɪnan nəzəɲə sùrí ku nə. Á pian yənu sùrí yofwamɪnan nəzəɲə tə nə. ⁶ Á pian, á yəni á tiàn janv, á sùrí yənu tə nə. Á pian, á ja pínó wuuu, á dàná ká pìí á kə á kwa, á sùrí á nə yèé á tiàn janv tə nə. Á pian, á twá Yú cwəɲə tə nə zəni, á nə jə, á sùrí pínó wuuu, á dàná ká pìí á kə á kwa tə nə. ⁷ Á pian, *Kərisə* lià tə duən sonu sùrí, á nə twá Yú nə zəni tə nə. Á pian, lià tə mama sonu sùrí lià tə duən tə, ba nə yí á nubia *Kərisə* yírí tə, sonu tə nə. ⁸ Də á nə tuɲa tə yìèn təntə, tə sùrí wuuu, tə wá pa, á mu tə ba ya tutv. Ku wá ja nywarɪ ku pa **Yuu-Tiu* Zwezi-*Kərisə* nə. Yá á ga wá yəni wá yənu, ku nə sùrí wuuu. ⁹ Yá liù tə, v nə ba tə yìèn təntə tuɲa, v ya ndə liliu nə, v ga ba yijunɪ na. U swèé də, Yú yà sɪn v cuna nədwara tə v lɪ.

¹⁰ À nubia-ba, Yú kúrí aba, v ga lɪ aba v tún. Ku mù nə pɪn, á kənə

kajaŋa, sə ku yoo təntə ja diàn, Ku twá á tutunɛɛ nə. Á nə fwa ku nətu, á bá mà á nɛɛ nə, á tu Yu cwəŋə wa abada. ¹¹ Yá ku nətu dàń wá pa, Yu pa á zu nə Yuu-Tiu Zwezi-Kərisə sàń tə wa, ku nə wulə máŋá mama wuuu. U mù Zwezi-Kərisə jon nəba nə cuna wa.

(1 Piyerə 1.10-12, 2 Timote 3.16)

¹² Á nəŋə, ku tə nə pɪn, à tə ma wá líí aba tə yìèn təntə wuuu. À yèé də, á dí yáá á yèé tə yìèn təntə, yá á ga zɪga diàn cígá tə wa, ba nə bɪrɪ aba. ¹³ Yá à dàń nɪ də, ku zìèn də, à tə nə wulə luu wa, sə à twá sagɪ ku tə nə, à ma zìn aba dwièn nə. ¹⁴ À swìn ku, à nə yèé də à tian bwələ, ndə nə Yuu-Tiu Zwezi-Kərisə nə bɪrɪ ku nə nətu. ¹⁵ Ku mù nə pɪn, à wá kə cígá mama, à kə aba cwəŋə tə nii nə. À fwa nətu, sə ku pa, á líí tə yìèn təntə, máŋá mama, à tian kwa nə.

¹⁶ Máŋá don wa, nə swìn nə Yuu-Tiu Zwezi-Kərisə diàn tə yoo, nə bɪrɪ aba. Yá nə ga swìn də, v wá pɪí v bà. Ku yoo təntə tà yomanan, tə nə nan ləzoni swian wa, nə twá nə ma swìn ku. Nə tətə nə nɪ v dun tə nə yíá wa. Ku mù nə pɪn, nə swìn ku yoo təntə. ¹⁷ U nɪ dun tə nə ba don jə, v nyina Yu con. Nə nì də, Yu tə, v dun nə dwə tə mama, v swìn, v wú: «U tə ba tə yɪ à biswənə tə, v nə poli à pùé.» ¹⁸ Nə nì ku mù kori təntə də, ku naŋa yu, də nə yà wulə də wá, ku mù paan*f1* tə yuu wa, Yu nə bɪrɪ v tiàn. ¹⁹ Yá nə dàń pɪn cígá Yu nii *sùsùnà tə sùràn tə nə, ba nə swìn, nə doni won mama. Ku zìèn də, á nə zùrì á yɪra, də ba sùràn tə, ba nə swìn. Tə yɪ ndə cànú nə. Cànú tə yáá pɪpɪlɪ yikunu wa, ku ja vələ tɪbulakunu, máŋá tə naŋun*f1* tə, nə wá pɛn, ku pa á na zəni zəni. ²⁰ Á nəŋə yoo tə, ku nə wulə yìèn tə mama yuu wa. Ku mù nə yɪ Yu nii sùsùnə wà mɛ, sə v gwin Yu nii tə sùràn tə, tə nə púpúní Yu sagɪ tə wa də v təntian yənu. ²¹ Yu nii sùsùnà tə sùràn tə, tà tə nan ləzwənə fɪra wa. Ku yɪ Yu-*Sɪŋu tə nə yigu ba, ku pa ba swìn tə sùràn təntə, tə nə nan Yu.

2

Kunkun karnyina-ba wá bà

(Tutunan 20.29-30, Zwidə 3-16, Apokalisə 2.14, 15, 2 Timote 3.1-9)

¹ Máná don wa, kunkun sùsùnà yin *Yizərayelə là tə wa. Yá máná don kúb wá bà, kunkun karnyina-ba wá ya á də tətəŋi wa. Ba mù kunkun karnyina-ba wá twá tia tia, ba kə ba kunkun kàrì tə, tə nə duga là á pwérə wa. Ba wá vi *Yuu-Tiu, v nə yè ba v jon ba cuna wa. Yá naa nədu ba wá van cuna nəfaru, ba di ba yuu wa. ² Là zənzən wá twá, ba nə ba ba tiàn janì tə nə. Yá là dān wá swìn yolwan, ba zigi cígá cwəŋə tə nə ba mù yiri. ³ Ba mù kunkun karnyina-ba wá kuna kunkun, ba ma gɪgarì aba, ba jon á wiən ba dé, á wiən tə yimən nə jə ba, yiri. Yá ba mù là təntə bura buri ku zwè, ku máná nə ba yigə. Liù tə, v nə wá cùgù ba tə, ba dwè. U bá dán, v ma cùgù ba míámíán.

Yu yèə nətu, v nə wá jon cígá tiàn tə

⁴ Yu wà *malikə tə tətə nə cùgù v nə máná don wa, yá tutu. U jun tə v dili tiga bwálí nə, v vwa tə, v tún yikunu wa. U ma dānì diun tə, v nə wá buri tə bura. ⁵ Yu wà Nowe máná là tə nə tun cuna tə də, yá tutu. U pin dwà nəfaru bà ku nà. Ku níá tə pè ba mù là tə, ba nə tuŋa tutunkukwɪnan, Yu nə ba pià. U wà ba liù mama jon, də ku nə tà Nowe, də là barpe duən ciɪ nə Yu jon, ku fuən luv təntə wa. Nowe yà swìn ku tə nə yi cígá, v buri là tə. ⁶ Yu buri *Sodəmə də Gomərə tiàn tə də bura, sə v cùgù tə. U pin mən dé tə tian təntə. Yá v dān twá ku mù yoo tə nə, v ma buri won tə, nə biàn là tə yuu wa, ba nə tuŋa tutunkukwɪnan tə, Yu nə ba pià. ⁷ Yá ku máná tə wa, Yu jon Lotə, v nə yi cígá tíú, v pa v nan, Sodəmə tiv tə wa. Máná tə, Lotə yà nə wulə Sodəmə tiv tə wa, v dí cən zənzən, ba mù là təntə, ba nə tuŋa tutunkukwɪnan tə, Yu nə ba swə, jun wa. ⁸ U nə ni ba yokukwɪnan tə

dun mama, v ga nën ba sukukwınan t , ba n  sw n, dun mama, t  y  n t nt  y  y  w  v bican wa z nz n, v n  y  c g  t   t  y r . ⁹ T  y  n t nt  mama b r  d , Yu y   cw    t , v n  w  t , v ma jon l   t , ba n  tw  v cw    t  z n , y  n ga w wal  ba. U y   cw    t , d  v n  w  tw , v ma ja l   t , ba n  t  a k nk n y  n t . U w  ja ba v t n, ku ja va ba dun t , v n  w  b r  ba bura.

K nk n k rny na-ba n  y  n tu

¹⁰ Yu w  pa, c n y  l   t , ba n  tw  ba p   yokukwınan f ra n , ba n  t  a dur n y  n, ba ga v  *Yuu-Tiu Yu d  n t , d  ba tw n t . Ba m  k nk n k rny na-ba,   n  sw n ba yoo, ba yuu d . Y  ba ga ba f n d r  s  ba tw n dun w  n t . ¹¹ Y  *mal ke t  j  d  n, t  don  ba m  l   t nt , t  ga ba s , t  tw n w  n t nt  Yuu-Tiu Yu y   con.

¹² Ba m  l   t nt  d  n fwa y  n nd  gan  a n , t  n  y r  t  y  . Gan  a y  t  wul , s  ba d  ba jan , ba gw . Ba n   s   d  tur n, ba n  ma tw n w  n, ba n  y r  t  d  n. Ba c g  ga y  ba w  t , nd  gan  a t nt  n . ¹³ Yu w  pa, ba d  c n. C n t nt  n  y  ba   w r  n ba tut n   n  t  c g  t  y r . M    mama, ba sw , s  ba fwa ku t  n  lwara d , ku n  sw  ku y  y c v t t  wa d . Ba n  wul  d  aba, ba tut n   t  y   k  cav ra   n . Y  t  ga ba yw  n t  pa aba. Ba sw , s  ba y  n ba ma k n  k nk n, ba b r  aba d , ba n  d  c n  d  aba. ¹⁴ Ba b  won don p  , d  ku n  t  kana, s  ba fwa bacwan d  ba. Ba ba lwan  fwa ba sw . Ba n  n  l   t , v n  ba d  n j  Yu cw    t  wa, ba y   y gu ku t  , ba pa v fwa c na. M    mama, l   du n w  n j  y m n t  pa ba. T  y  n t nt  n  b r  d , Yu w  b r  ba bura. ¹⁵ Ba dugv c g  cw   , ba ga t  j  n cw   . Ba tw  Bew r  b   Balam  j  n cw    t  n , ku n  y  s b sw n  cw   . U s n , s  v fwa tut n   t  n  t  c g , s  v ga na s biu. ¹⁶ Y  Yu tw  d  b n , v ma caga v n i *s s n  Balam  n i n , v c na t  y r . B n  n i ba sw n, y  ka sw n Balam  con d 

læzwənə kori. Ka cìgà v nə, sə v dân ká fwa ku mù yutəlu yoo təntə.

¹⁷ Ba mù kunkun karnyina-ba tə, à nə swìn ba yoo á con tə, yí ndə nabuliyia nə, tə nə kua. Ba yí ndə bakwan nə, voo nəfaru nə fuli ku yigə, dwà ga ba nì. Yu kwen yikunu bwálí, v tún ba nə. ¹⁸ Ba yí là tə, ba nə swìn sufaran. Ba sùràn tə ga ba dèñ jə. Ba swìn sùràn təntə, sə tə twá là tə pùé fira yokukwınan nə. Ku là təntə dân nə zəzən ba lı ba tiàn, là tə wa, ba nə jén, ku tə nə wà díán tə pìí, ba jén. ¹⁹ Ba mù kunkun karnyina-ba yàà kàn nii là tə con də, ba wá pa ba tunı ba tiàn. Yá ba tətə dân ga yí ba cuna tə ywəŋə, ba ba ba tiàn tı. Won nə dí diàn liù yuu wa, ku tíú yí ku yonju.

²⁰ Ku yí cígá, là tə, ba nə yəé Yuu-Tiu Zwezi-Kərisə, v jon ba ba cuna wa. Yá ba lı ba tiàn luu ku tə gıgara yìèn tə wa. Là təntə nə pìí, ba kə ba tiàn tə yìèn təntə wa, ba pa tə dé diàn ba yuu wa, ba yígúré wá ya càn, ku doni dí yáá. ²¹ Ku yà wá kwanı ku pa ba, də ba yà nə wà cígá cwəŋə tə yəni, ku doni ba nə yəni ka, yá ba ga kúbə ba Yu nii tə, ba nə pın ba zılí. ²² Yoo tə nə wá yí ba là təntə, burı nəba də, ku tə nə swìn zwansısarı tə wa, yí cígá. Ku swìn, ku wú: «Ku yí ndə kukurə nə tunı, ka pìí ka dé.» Ku swìn zwansısarı don wa, ku wú: «Ku yí ndə ba nə swə too, ku ga pìí ku va ku tu titaran wa, ku bəbəli.»

3

Yuu-Tiu ka pìí ka bà yoo

(Zwidə 17-19, Matia 24.37-38, 2 Tesalonikə tiàn 1.7-10, Apokalisə 20.11)

¹ À nubisoni-ba, á nəŋə, à sagı bələ nii nyiən nə, à púpúní á nə. Tə saga bələ tə me wa, à nə púpúní, à swìn yìèn á con, à nə ma lii aba. À pià, sə á bún tə yìèn tə yoo də pubuŋa, ku nə ziən. ² À pià, sə á lii á tiàn sùràn tə yoo, Yu nii *sùsùnà tə nə swìn á con fuən fuən. Á lié Yu cwəŋə tə sùràn də yoo, á *tuntuna tə nə swìn, ba burı aba. Tə sùràn təntə nan *Yuu-Tiu. U mù

nə jon nəba nə cuna wa. ³ Á lwara də, luu zaŋu máŋá wa, mumunyina, ba nə swə ka kukuli là, wá bà. Ba wá ya là tə, ba nə tuŋa ba pùó yokukwɪnan fira. ⁴ Ba wá swìn, ba wú: «U wà swìn də, u wá bà, naaa? Sə u wa yèn nə? Nə nɪbara-ba nə təlá, ku ba yigə. Won mama ga tə wà lwàn. Wiən tə mama tə yi ndə, nətu tə luu dèñ laŋu máŋá nə yun.» ⁵ Ba swìn ku nətu tə, yá ba ga kùb ba pià ba lií yoo nədu ku tə. Ba swèé də, luu dèñ laŋu máŋá wa, Yu twá u nii sugu nə, u ma fwa lanworu də tia. U pin tia pén ku nan níá wa, ku ga yi ku twá níá nə, tia ma fwa. ⁶ Mə níá nə nə, Yu kùb twá, u ma cùgè tia yuu wiən tə mama, də dwà nəfaru təntə, ku nə twi ku nà ku máŋá tə wa. ⁷ Yu nə kùb twá sugu təntə nə, u pa nii də, zèn lanworu ku tə də tia tə, wá tún tə diàn dun tə, u nə wá pa tə mama dé mən. Ku yoo təntə wá tun dun tə nə, u nə li u tún, sə u bùrì bura tə. Ku dun tə nə, u wá cùgè là tə mama, ba nə tuŋa tutunkukwɪnan tə, u nə ba pià.

⁸ À nubisoni-ba, yoo nədu nə, á wà mɛ, sə á swèé ku yoo. Á mɛ, sə á lwari də, Yuu-Tiu Yu con nə, dun nədu yi ndə bina mùrù nə. Yá bina mùrù də yi ndə dun nədu nə. ⁹ Là duən buŋa də, Yuu-Tiu nikanɪ tə dání, ku nii ba sú. Ku nətu tà cígá. Yá ku dàñ nə yi pínú, u fwa də aba. U ba pià, sə á ladua jén. U pià, sə á mama vəvəri á kwa, á ma sá á cuna tə.

¹⁰ Yuu-Tiu ka pìi ka bà tə, wá di là yuu ndə ŋwìàn nə. Ku dian təntə nə, lanworu tə wá jén də zəzugu nəfaru. Mən wá dé wiən tə mama nə wulə lanworu tə wa. Yá tia tə də ka yuu wiən tə mama wá dé mən, tə jén lá nə.

(Likə 21.34-36, 1 Tesalonikə tián 5.1-10, Apokalisə 21.1)

¹¹ Tə wiən tə mɛ wá jén, ndə nətu nə, ku nə swìn. Á dàñ mɛ, sə á fwa ku tə, Yu nə swə, á ga twá u cwəŋə tə zəni. ¹² Də ku dun təntə, Yu nə wá bùrì bura, tə nə ma biàn, á kənə á kajaŋa lá, sə ku bà lala. Ku dun təntə nə, lanworu tə wá kwé mənvo, ku ga nyun lá. Ku mù lanworu tə də ku wa wiən tə mama wá kwé mən tə nyian tə jén. ¹³ Nə mù dàñ yi nə dànì lanworu nədun də tia nədun, yoo mama nə wá tun də cígá lá nə, ndə Yu

nə kàn nii nətu tə, ʋ pa nəba.

¹⁴ À nubisoni-ba, ku mù nə pɪn, mánǵá tə, á nə dànì ku dun tǝntǝ, á kǝnǝ dǝn, sə Yuu-Tiu bà, ʋ yí aba, də á ba yolwan də cuna jǝ, Yu yáá con. Ku mǝ, sə ʋ bà ʋ yí, də á yɪ là tə, á nə wulǝ bɪcan sìǝ wa də Yu. ¹⁵ Á lwara də, nə Yuu-Tiu Yu pínú tə, yɪ ku saǵa aba, sə ʋ ma jon aba á cuna wa. Nə nubiswǝnǝ, Polǝ twá wubɔŋa tə nə, Yu nə pɪn wá, ʋ ma púpúní ku yoo tǝntǝ tǝtǝ, ʋ pa aba. ¹⁶ Saga tə mama wa, ʋ nə púpúní tə yìǝn tǝntǝ yuu wa, ʋ yáá swìn ku nətu. Sǝrǝn wulǝ tə saga tə wa, là nə ba tə dǝn nǝn mwálí mwálí. Là tə nə ba yǝnu jǝ, də là tə, ba nə ba dǝn jǝ Yu cwǝŋǝ tə wa, wǝrì tə dǝn ba nì. Ba yáá lwǝn tə mù sǝrǝn tǝntǝ, ndǝ ba nə lwǝnì Yu sagɪ tə sǝrǝn tə duǝn nətu tə. Ba fwa ku yoo tə nətu, ku ga wá pa Yu cǝgǝ ba.

¹⁷ À nubiswǝnǝ-ba, á mù con nə, á mù dí yáá á yǝǝ tə yìǝn tə yoo. Á dǝn cia á tǝn nə, sə ba mù là tǝntǝ, ba nə ba Yu nii zílí tə, dǝn ká yigu aba, ba kǝ ba jíún cwǝŋǝ tə wa. Ku nətu dǝn ká pa á ba zǝni zǝga Yu yìǝn tə wa.

¹⁸ Á dǝn vǝlǝ yáá wuuu, də nə Yuu-Tiu Zwezi-Kǝrisǝ. ʋ wá fwa pubwanu á yura, ku nə súrí wuuu, sə á ga yǝni wá yǝnu, ku nə súrí wuuu. ʋ mù nə jon nəba nə cuna wa. ʋ mù nə mǝ də dun, ku nə zǝgɪ síún ku ja vǝlǝ mánǵá də mánǵá wuuu, ku nə ba zwǝ. Amuna!